

**REGIONAL NEWS UNIT
ALL INDIA RADIO, AGARTALA**

Date: 05-10-2023

**Time: 07.35-07.40 AM Hrs
BENGALI MORNING BULLETIN**

PM Ujjala Yojona:

সরকার প্রধানমন্ত্রী উজ্জ্বলা যোজনার সুবিধাভোগীদের জন্য সিলিন্ডার পিছু LPG গ্যাসের ভুতুঁকি ১০০ টাকা বাড়িয়েছে। নতুন দিল্লিতে গতকাল এক সাংবাদিক সম্মেলনে কেন্দ্রীয় তথ্য সম্প্রচার মন্ত্রী অনুরাগ সিং ঠাকুর জানান, কেন্দ্রীয় মন্ত্রিসভার বৈঠকে এই সিদ্ধান্ত গৃহিত হয়। ফলে এখন থেকে উজ্জ্বলা যোজনার আওতায় প্রতি LPG সিলিন্ডারে গ্রাহকরা দুশ টাকার পরিবর্তে তিনশ টাকা করে ভুতুঁকি পাবেন।

Sikkim flood:

সিকিমে, আকস্মিক বন্যায় নিখোঁজ সৈন্যদের জন্য ভারতীয় সেনাবাহিনীর অনুসন্ধান ও উদ্ধার অভিযান অব্যাহত রয়েছে। গতকাল সন্ধ্যায় একজন জওয়ানকে উদ্ধার করা হয়েছে। তার অবস্থা স্থিতিশীল।

নিখোঁজদের পরিবারের সদস্যদের সঙ্গে যোগাযোগ করে পরিস্থিতি সম্পর্কে জানানো হয়েছে। সিকিম এবং উত্তরবঙ্গে নিয়োজিত অন্যান্য সমস্ত ভারতীয় সেনা কর্মী নিরাপদে রয়েছেন। তবে মোবাইল যোগাযোগ বিঘ্নিত হওয়ার কারণে তারা তাদের পরিবারের সদস্যদের সঙ্গে যোগাযোগ করতে পারছেন না।

রাজ্য দুর্যোগ ব্যবস্থাপনা কর্তৃপক্ষ জানিয়েছে যে মাঙ্গান জেলায় ১৬ জন নিখোঁজ হওয়ার খবর পাওয়া গেছে, ৭০টি পরিবারকে ত্রাণ শিবিরে স্থান দেওয়া হয়েছে এবং প্রায় দশ হাজার মানুষ ক্ষতিগ্রস্ত হয়েছেন।

গ্যাংটক জেলায়, সিংটাম থেকে দুটি মৃত্যুর খবর পাওয়া গেছে, ১৫ জন নিখোঁজ হয়েছেন। প্রায় ২০০ পরিবার ক্ষতিগ্রস্ত হয়েছে এবং এক হাজারেরও বেশি লোককে সরিয়ে নেওয়া হয়েছে।

পাকিয়ং জেলায়, ১৫০টি পাকা বাড়ি এবং ১২৭টি কাঁচা ঘর ক্ষতিগ্রস্ত হয়েছে বলে জানা গেছে এবং ৫৬জনকে সরিয়ে নেওয়া হয়েছে।

সিকিমের মুখ্য সচিব ভিবি পাঠক গতকাল উদ্ভূত পরিস্থিতির পর্যালোচনা করতে ভারত সরকারের ক্যাবিনেট সচিব রাজীব গৌবার সভাপতিত্বে জাতীয় সংকট ব্যবস্থাপনা কমিটির একটি ভার্চুয়াল বৈঠকে যোগ দেন।

শ্রী গৌবা প্রয়োজনীয় সবধরনের সহায়তা দেওয়ার আশ্বাস দেন। তাৎক্ষণিক সাহায্য হিসেবে

NDRF-এর তিনটি অতিরিক্ত প্লাটুন চুংথাং, রংপো এবং সিংটামে পাঠানো হচ্ছে। আবহাওয়া অনুকূল থাকলে চুংথাংয়ের জন্য এনডিআরএফ দলকে আকাশপথে পাঠানো হবে।

Administrative Reshuffle:

রাজ্য প্রশাসনের মাঝারি স্তরে কিছু রদবদল ঘটানো হয়েছে। স্বাস্থ্য ও পরিবার কল্যান দপ্তরের সচিবের দায়িত্ব দেওয়া হয়েছে ডা: সন্দীপ রাঠোর রেওয়াজিকে। দেবাশিস বসুকে সাধারণ প্রশাসন বিভাগের সচিবালয় প্রশাসন, পলিটিক্যাল

বিভাগের সচিবের দায়িত্ব দেওয়া হয়েছে। পশ্চিম ত্রিপুরা জেলার জেলা শাসক দেবপ্রিয় বর্ধনকে উত্তর জেলার জেলা শাসকের দায়িত্ব দেওয়া হয়েছে। পশ্চিম জেলার জেলা শাসক হবেন সিপাহীজলা জেলার জেলা শাসক ডাঃ বিশাল কুমার। উত্তর জেলার জেলা শাসক নাগেশ কুমার বি- কে সিপাহীজলা জেলার জেলা শাসক হিসাবে বদলী করা হয়েছে। উনকোটি জেলার জেলা শাসক তড়িৎ কান্তি চাকমাকে গোমতী জেলার জেলা শাসক পদে বদলী করা হয়েছে।

PM, Rajasthan :

প্রধানমন্ত্রী নরেন্দ্র মোদি আজ রাজস্থানের যোধপুরে যাবেন। সেখানে তিনি সড়ক, রেল, বিমান চলাচল, স্বাস্থ্য এবং উচ্চ শিক্ষা ক্ষেত্রে প্রায় পাঁচ হাজার কোটি টাকার একাধিক উন্নয়ন প্রকল্পের ভিত্তিপ্রস্তর স্থাপন করবেন এবং জাতির উদ্দেশ্যে উৎসর্গ করবেন।

Energy Transition in Tripura :

মুখ্যমন্ত্রী অধ্যাপক ডাঃ মানিক সাহা পুনর্নবীকরণ যোগ্য শক্তি উৎপাদনে ত্রিপুরায় বিনিয়োগে এগিয়ে আসার জন্য বেসরকারী সংস্থাগুলোর প্রতি আহ্বান জানিয়েছেন। বিনিয়োগের জন্য রাজ্য সরকারের আকর্ষণীয় শিল্পনীতি রয়েছে বলে উল্লেখ করেন তিনি। গতকাল আগরতলার রাজ্য সরকারের বিদ্যুৎ বিভাগ এবং এশীয় উন্নয়ন ব্যাংকের যৌথ উদ্যোগে আয়োজিত ত্রিপুরায় শক্তি ক্ষেত্রে উত্তোরণ শীর্ষক এক দিনের এক কর্মশালার উদ্বোধন করে মুখ্যমন্ত্রী এই আহ্বান জানান।

কর্মশালায় বিদ্যুৎমন্ত্রী রতন লাল নাথও ত্রিপুরায় পুনঃনবীকরণ যোগ্য শক্তি উৎপাদনের বিনিয়োগে এগিয়ে আসার আহ্বান জানান।

Central Tribal University:

কেন্দ্রীয় বিশ্ববিদ্যালয় আইন ২০০৯ এর সংশোধনী অনুমোদন করেছে সরকার। মন্ত্রিসভার এই সিদ্ধান্তের ফলে তেলেঙ্গানায় সমাঝা সাড়াঝা কেন্দ্রীয় আদিবাসী বিশ্ববিদ্যালয়ের স্থাপনের পথ সুগম হবে। উল্লেখ্য, তেলেঙ্গানার মুলুগু জেলায় আটশ উননব্বুই কোটি টাকা ব্যয়ে এই বিশ্ববিদ্যালয় স্থাপন করা হবে আদিবাসী জনগোষ্ঠীর পড়ুয়াদের উচ্চ শিক্ষার গুণগত মান উন্নয়ন উপজাতির মানুষদের শিক্ষা সংস্কৃতি ঐতিহ্যগত জ্ঞানের শিক্ষামূলক ব্যবহার এবং ছাত্র ছাত্রীদের গবেষণার সুবিধা প্রদান এই বিশ্ববিদ্যালয় স্থাপনের মূল উদ্দেশ্য।

PM, e-bus :

সারাদেশের অন্যান্য শহরের পাশাপাশি আগরতলা শহরেও পিএম ই-বাস পরিষেবা চালু হবে। পরিবহণ মন্ত্রী সুশান্ত চৌধুরী গতকাল সচিবালয়ে পিএম ই-বাস পরিষেবা চালু নিয়ে গুরুত্বপূর্ণ বৈঠকে পৌরহিত্য করেন। মন্ত্রী শ্রী চৌধুরী বলেন, এই ই-বাস পরিষেবাকে সার্থকভাবে রূপায়িত করার জন্য দরকার এর সাথে সম্পৃক্ত বিভিন্ন বিষয়ে আগাম প্রস্তুতির। পরিবহন মন্ত্রী বৈঠকে সংশ্লিষ্ট বিভিন্ন বিষয় নিয়ে আধিকারিকদের সঙ্গে আলোচনা করেন।

PCC prez Ashish Saha:

প্রদেশ কংগ্রেস সভাপতি আশিস কুমার সাহা অবিলম্বে হকার উচ্ছেদ অভিযান বন্ধ রাখার দাবি জানিয়েছেন। তিনি জানান গতকাল প্রদেশ কংগ্রেস ভবনে সদর জেলা কংগ্রেস কমিটির বৈঠকে এই দাবি করা হয়। প্রদেশ কংগ্রেস সভাপতির নেতৃত্বে আয়োজিত বৈঠকে বর্ধিত বিদ্যুৎ মাশুল প্রত্যাহার ও পুর নিগমের নয়া সম্পদকর প্রত্যাহারেরও দাবি করা হয়েছে। তিনি অভিযোগ করে বলেন, শারদীয়া দূর্গোৎসবের আগে এধরনের হকার উচ্ছেদ পুর প্রশাসনের এক অমানবিক ও শৈরাচারী পদক্ষেপ।

ICC World Cup:

ICC-র ত্রয়োদশ এক দিনের বিশ্বকাপ ক্রিকেট আজ থেকে ভারতে শুরু হচ্ছে। উদ্বোধনী ম্যাচে গতবারের চ্যাম্পিয়ান ইংল্যান্ড রানার্স আপ নিউজিল্যান্ডের মুখোমুখি হবে। আহমেদাবাদের নরেন্দ্র মোদী স্টেডিয়ামে আজ খেলা শুরু হবে দুপুর দুইটায়।

Weather :

আবহাওয়ার পূর্বাভাসে জানানো হয়েছে, সাধারণত মেঘাচ্ছন্ন থাকবে। কিছু কিছু জায়গায় বজ্র বিদ্যুৎ সহ বৃষ্টিপাতের সম্ভাবনা রয়েছে। আবহাওয়া দপ্তর থেকে সিপাহিজলা জেলায় বজ্র বিদ্যুৎ সহ ভারী বৃষ্টিপাতের সতর্কতা জারি করা হয়েছে। আজ দিনের তাপমাত্রা সর্বোচ্চ ত্রিশ ডিগ্রির কাছাকাছি থাকবে। আজ সকালে সর্বনিম্ন তাপমাত্রা ছিল চব্বিশ দশমিক আট ডিগ্রি সেলসিয়াস। সকাল সাড়ে পাঁচটা পর্যন্ত বৃষ্টি হয়েছে ১৩ দশমিক এক মিলিমিটার।

* * * * *